

ACTA DA SESIÓN EXTRAORDINARIA E URGENTE CELEBRADA POLA COMISIÓN INFORMATIVA PERMANENTE DE URBANISMO, VIVENDA, INFRAESTRUTURAS, PARQUES E XARDÍNS E MEDIO AMBIENTE O DÍA 17 DE FEBREIRO DE 2015 ÁS 10:00 HORAS.

Sendo as dez horas (10:00) do día 17 de febreiro de 2015, reúnese en sesión extraordinaria e urgente convocada ao efecto a Comisión Informativa Permanente de Urbanismo, Vivenda, Infraestruturas, Parques e Xardíns e Medio Ambiente, coa asistencia das/os concelleiras /os que de seguido se indican.

Concelleiras/os asistentes:

Vocais:

Grupo municipal popular	Grupo municipal socialista	Concelleiras/os non adscritas/os
Santiago V. Amor Barreiro	José Blas García Piñeiro	Xosé Anxo Doval Rey
Bernardo Moar Miguez	María Isabel González Cancela	Manuel J. Ferreiro Santiago
		Emilio Martínez Carballeira

Presidente: Santiago V. Amor Barreiro.

Secretaria : Rosa Ana Prada Queipo.

A petición do concelleiro José Blas García Piñeiro, as intervencións desta sesión se reflectirán literalmente na acta correspondente.

ORDE DO DÍA:

Punto Primeiro.- Ratificación da urxencia da convocatoria.

Intervén o **presidente** que di: O motivo da celebración desta comisión informativa por vía de urxencia é consecuencia dos prazos que temos para aprobar o Plan de Aforro e Investimento da Deputación da Coruña, de todo o proceso que levou a elaboración dos proxectos e as peticións feitas pola oposición. A ninguén se lle escapa que este Plan, tal e como como figura nas bases e no expediente correspondente, non permite levar obras novas, nin proxectos de menos 30.000 euros.

Intervén **Anxo Doval** que di: Eu non entendo o motivo da urxencia desta convocatoria. O Plan xa se coñece dende o mes de novembro, e no último pleno se dixo que había proxectos que xa estaban elaborados. Non podo entender a urxencia, ao non ser que estes proxectos que agora se presentan, teñan tanto interese ou urxencia que teñan que ser elaborados no último día de prazo, tendo que convocar pleno para o martes de Entroido.

Intervén o **presidente** que di: Comentar a Anxo que efectivamente algún proxecto xa estaba elaborado, como é o da depuradora do Milladoiro, pero outros houbo que realizalos estes días porque o que había eran memorias valoradas. Se pediu a todos os membros da oposición as súas propostas, non queríamos traer algunha proposta sen antes ter consultado coa oposición, ese foi o motivo de que se demorara a convocatoria.

Contesta **Anxo Doval**: A oposición fai moitísimo tempo que fixera as proposta e foran entregadas ao goberno. En todo caso, a responsabilidade é do goberno.

Intervén **Isabel González**, que di: So por puntualizar, á oposición nin se lle preguntou nin se lle consultou nada.

Intervén o **presidente** para dicir: A aqueles concelleiros que fixeron propostas concretas se lles consultou, non os que fixeron propostas xenéricas.

A urxencia da convocatoria é ratificada por **maioría simple** cos votos a favor dos 2 membros do grupo municipal popular, o voto en contra do concelleiro Anxo Doval Rey e a abstención do resto dos asistentes á comisión informativa.

Punto Segundo.- Participación no “Plan de aforro e investimento (PAI) 2015” da

Deputación Provincial da Coruña.

Intervén o **presidente**, para dicir: O Plan de Aforro e Investimento da Deputación, contempla para Ames un total de 390.664,62 euros. Desá cantidade, váise destinar a amortización da débeda o 24,25% tal e como recolle o informe da Intervención Municipal. As bases deste plan permiten destinar a obras de reparación e mantemento, dentro dos epígrafes correspondentes que figuran nas bases, 295.928,45 euros. Se propoñe adicar eses cartos a diferentes obras de reparación nos lugares de Castelo, Trasmonte, Suevos, Salgueiro, Paramuíño, Pegariños e nas rúas Pesqueira, Entrerríos e Ameneiral de Bertamiráns, ademais das melloras na E.D.A.R. do Polígono do Milladoiro. Se intentou tamén incluír algunha outra obra de reparación, como era o tema do cemiterio, pero as bases nono permiten.

Intervén **Anxo Doval**: A min non acaba de cadramme que fai un par de anos tiveramos que pedir un préstamo obrigatoriamente, obrigados pola administración central, gobernada polo Partido Popular, para pago a provedores a un tipo do 6% e agora isto. Me gustaría que o interventor informara a canto ascenden os xuros dese préstamo de pago a provedores. E agora, a tres meses dunhas eleccións, sae esta convocatoria da Deputación cun xuro do 0%, lástima que non fora así o préstamo ao que nos vimos obrigados hai un par de anos.

A min me parece que estamos xogando cos cartos públicos dunha maneira irracional e dándolle ás entidades privadas, neste caso aos bancos, uns depósitos que axudan a súa capitalización. Considero que é pouco razoable todo isto que se está facendo e o direi no pleno. Ao respecto das obras, boto en falta unha planificación, non entendo porque unhas obras si e outras non, algunhas podo entendelas, podo entender Pegariños por exemplo, neste momento. Pero sigo sen aceptar que a administración traballe desta maneira, tan pouco planificada, en función de intereses meramente electorais.

Intervén o concelleiro **José Blas García Piñeiro**, que di: O que nos conta o alcalde agora me parece que, como se di no meu pobo, son escusas de mal pagador. Eu vou a recordar as datas, e no mes de novembro xa se sabía que ía a haber este Plan de Aforro e Investimento porque xa se encargou a Deputación de anunciálo. O 2 de decembro sae publicado no BOP, o 7 de xaneiro ábrese o prazo para presentar as propostas. O 15 xaneiro o grupo socialista presenta un escrito cunhas propostas. E resulta que o venres pasado, aínda non sabemos se vai haber pleno nin comisión nin nada, e so temos á última hora, unha parte das obras que se van a facer. Onte pola mañá nos dan información do resto das obras, e de toda documentación dispoñemos de copia a primeira hora da tarde, cando o prazo remata mañá as dúas da tarde. A verdade é que a data para celebrar pleno e comisión é a mellor que hai, martes de Entroido. Isto parece unha burla.

Todo isto o que pon de manifesto, sen dúbida, é a pouca dedicación que lle presta este goberno aos temas importantes, e despois a maiores diso tamén quero facer constar a falta de consideración que ten este goberno cara o resto de concelleiros da corporación. A min paréceme lamentable que 16 concelleiros desta corporación teñamos que bailar o son que nos marcan 5 que son os do goberno. Me imaxino que non serán os cinco e que serán un ou dous, pero que a estas horas aínda non saibamos se o pleno vai a ser hoxe ou vai a ser mañá, paréceme unha burla cara a nos, total e absoluta. Os concelleiros da oposición algúns traballan, por sorte, e outros teñen familias e ningún deles ten dedicación exclusiva e cobrando como ten este goberno. Non temos necesidade de estar as expensas dos que nos marquen vostedes, creo que se están rindo bastante de nos e tamén dos veciños.

Sobre o tema das obras propostas no Plan, coincidimos con Anxo en que descoñecemos os criterios de por qué se inclúen estas obras e non outras. Nos gustaría que se falara coa oposición, como se ten feito nalgunha ocasión. Sen dúbida, todas as obras son importantes, e imaxinamos que cando se meten neste Plan será porque é necesario facelas, pero tamén hai outras necesarias que non se contemplan e non se fala coa oposición. Outra dúbida é o criterio que se seguiu para amortizar débeda, se inclúe o mínimo establecido; ¿por qué o mínimo?, a situación do concello é tan bollante economicamente para non poder incluír mais e, ¿por qué solo se inclúen obras de arranxo de pistas e non obras de saneamento, por exemplo?.

Intervén **Emilio Martínez Carballeira**, para dicir: Independentemente de estar de acordo con parte do que dixo o concelleiro Blas, Pacto por Ames o que realmente ve é que estamos caendo continuamente na mesma enfermidade, e xa é unha enfermidade crónica, traer as cousas sempre tarde, mal e arrastro. Moi o meu pesar, teño que dicir que isto non son formas de traballar nin de

traer cousas tan importantes como son as que se están tratando nesta comisión, dun día para outro, sen consultar absolutamente con ninguén e temos que tragar con todo o que lle sae das narices ao señor alcalde. Se houbera un pouco mais de relación coa oposición non tiña porque pasar isto. Que as obras son todas importantes, non cabe dúbida, que unhas son mais importantes que outras, tamén; ao mellor, en vez de facer algunha das que estamos levando hai outras mais necesarias. Hai obras que non había necesidade de levalas porque non están nunha situación tan precaria, ¿por qué se mete a rúa Ameneiral?. Neste caso, estou tirando contra o meu propio tellado, pero eu creo que o asfaltado da rúa Ameneiral non ten tanta falta, sen embargo, hai outras que si e non sei porque non se meten. Quixera facer constar que notificamos por rexistro o día 15 de xaneiro as nosas propostas, e que recibimos comunicación da comisión ás 17 horas de onte. Que nos parece unha informalidade e unha falta de respecto ás persoas de Ames que se leve isto de forma tan improvisada, sabendo dende hai meses deste Plan. Debido á falta de traballo deste goberno haberá que celebrar un pleno extraordinario, coa conseguinte perda de tempo e diñeiro, e unha vez mais o goberno endosa a responsabilidade aos membros da oposición. porque non é capaz de chegar a un mínimo consenso.

Intervén **José Blas García Piñeiro**, que di: Quería apuntar unha cousiña a raíz da intervención de Emilio. Vostede dixo na súa primeira intervención que unha das razóns polas que houbera que esperar a ultima hora era polas propostas dos grupos da oposición, foi o que dixo na súa primeira intervención. Dixo que algunhas propostas habían sido concretas e outras habían sido xenéricas. Se PxA mete as súas propostas o día 15, e nos as metemos o día 15, e os compañeiros de Ames Novo non meten nada ¿por qué esperan ata agora?, ¿por qué saen vostede na prensa dicindo que ninguén fixo propostas concretas, qué ninguén fixo propostas?.

Contesta o **presidente**: Vostede é un profesional da política e eu xa o sei, dálle as voltas as palabras. Eu dixen na prensa, en contestación a unha nota de prensa súa, do seu grupo, que as bases din, non sei si as leu, supoño que si, as bases din os epígrafes nos cales se poden levar a cabo obras ou se pode presentar proxectos e sempre fala de obras de reparación e de mantemento. Vostedes falan de que se dedique a saneamento.

Di **José Blas García Piñeiro** : tamén se poden rematar obras que están empezadas.

Intervén o **presidente**, para dicir: ¿Cómo aquela do Plan E que deixaron vostedes e que estamos intentando arranxar?, ¿cómo esa obra?. Xa lle darei información do que lle esta custando aos veciños non poder conectarse ao saneamento. Ao que pregunta **Isabel González**: E como non a meteu aquí?.

Intervén o **presidente** que di: Vamos a rematala, pero non con fondos municipais porque hai unha obriga de quen non fixo as cousas ben. Vostedes falan e sacan unha proposta efectivamente o día 15 de xaneiro, xenérica, non relacionan as obras nin as problemática dos veciños de Ames. Nos non nos rimos de ninguén, ao mellor vostedes se rin cando din alegremente que se adique este Plan a saneamento, non se pode adicar a saneamento, a obras novas de saneamento. O resto de compañeiros da oposición, como o señor Anxo Doval, teñen manifestada claramente a súa posición, e do resto de compañeiros de corporación houbo outros que non quixeron facer propostas e outros que quixeron facer propostas e as fixeron o día 15; algunhas se podían incluír e outras non. Se falou con eles para priorizar, falou o concelleiro de Vías e Obras que hoxe non pode estar aquí. ¿Como que non se fala!, aquí falar se fala, qué ao final se retrasaron os proxectos?, é verdade e non se pode convocar unha comisión informativa sen os proxectos. ¿Por qué se destina o mínimo ao pago da débeda?, porque aquí neste pleno se ten dito pola oposición que se intentase sempre destinar o máximo posible a obras.

Intervén **José Blas García Piñeiro**, para dicir: Queda claro tal é como se ve nos investimentos que se fan no PAI que si se poden destinar cartos a saneamento. Ao que o **presidente** di: a reparacións. Continua **José Blas García Piñeiro**: seguramente vostedes teñen datos que nos non temos de obras de saneamento que faltan por rematar. Nos temos

información porque falamos cos veciños e por iso levamos solicitando toda a lexislatura que se invirta en saneamento, polas súas peticións, ben sexa novo ou ben reparacións; se este plan non permite obras novas que sexan reparacións. Todos sabemos o que pasou, vostede quixo incluír unha obra que non se podía, déronse conta tarde e por iso as presas, pero non culpe a oposición.

Apunta o **presidente**: eu non culpo a ninguén, é vostede o que está culpando ao goberno.

Continua **José Blas García Piñeiro**: non culpe á oposición da súa mala xestión e de non saber as obras que entran e as que non entran.

Rematadas as intervencións, o asunto é ditaminado favorablemente por **maioría simple**, cos votos a favor dos 2 representantes do grupo municipal popular e a abstención do resto de asistentes á comisión informativa.

E non habendo mais asuntos de que tratar o señor presidente da por rematada a sesión ás dez horas e vinte minutos do día de referencia de todo o que eu como secretaria certifico.

Vº e praxe

O presidente

A secretaria